



ՍՈՒՐԲ ՀԱԿՈԲ

ԱՌԱՋՆՈՐԴԱՆԻՍՏ ՄԱՅՐ ԵԿԵՂԵՑԻ

Կարմիր Կրոսկի
3 ՄԱՅԻՍ 2020

ԸՆԹԵՐՑՈՒՄ

«ԱՌԱՔԵԱԼՆԵՐՈՒՆ ԳՈՐԾԵՐԸ»
ԳԻՐՔԵՆ
(13.16-43)

Պօղոս ոտքի եղաւ, ձեռքով նշան ըրաւ
որպէսզի լուեն, եւ ըսաւ.

«Ո՞վ իսրայէլացիներ եւ աստուածավախ
մարդիկ, մտի՛կ ըրէք: Այս ժողովուրդին՝ Իսրայէլի
Աստուածը ընտրեց մեր հայրերը, բազմացուց մեր
ժողովուրդը որ Եփիպտոսի մէջ որպէս պանդուխտ
կ'ապրէր, եւ իր մեծ գորութեամբ զանոնք հոնկէ
հանեց: Շուրջ քառասուն տարի անապատին
մէջ կերակրեց զանոնք: Ապա Քանաան երկրի
բնակիչ եօթը ազգերը պարտութեան մատնելով,
անոնց երկրը մեր ժողովուրդին տուաւ որպէս
ժառանգութիւն: Այս բոլորը եղան մօտաւորապէս
չորս հարիւր յիսուն տարիներու ընթացքին: Այսուհետեւ Դատաւորներ տուաւ անոնց, մինչեւ
Սամուէլ մարդարէի ժամանակը, երբ մեր ժողովուրդը
թագաւոր ուզեց, եւ Աստուած թագաւոր կարգեց
Սաւուղը, կիսի որդին որ Բենիամինի ցեղէն էր,
քառասուն տարուան համար: Սաւուղէն ետք
անոնց վրայ թագաւոր կարգեց Դաւիթը, որուն
մասին նաեւ վկայեց, ըսելով.

“Դաւիթը, Յեսսէի Որդին, սրտիս խօսող անձն
է, որ ամբողջութեամբ իմ կամքս պիտի կատարէ”:

«Անոր սերունդէն էր որ Աստուած Իսրայէլի
տուաւ իր խոստացած Փրկիչը՝ Յիսուսը: Բայց
նախքան անոր հրապարակ գալը, Յովհաննէս
Իսրայէլի ամբողջ ժողովուրդին կը քարոզէր
որ ապաշխարեն եւ մկրտուին: Եւ իր պաշտօնը
լրացնելու ժամանակ, Յովհաննէս ըսաւ. “Ո՞վ կը
կարծէք զիս: Ես ձեր սպասած անձը չեմ: Ահա ինձմէ
վերջ կու գայ անիկա, որուն կօշիկները հանելու
իսկ արժանի չեմ ես”:

«Եղբայրներ, Աբրահամեան տոհմի զաւակներ
եւ ձեր մէջ գտնուող աստուածավախ մարդիկ.
Վրկութեան այս պատգամը Աստուած ձեզի՛
դրկեց: Որովհետեւ երուսաղէմի բնակիչները
եւ իրենց իշխանները չճանչցան Յիսուսը, եւ

զայն դատապարտելով՝ կատարած եղան խօսքը
մարդարէներուն որ ամէն Շաբաթ կը կարդային: Եւ թէպէտ մահուան արժանի յանցանք մը չգտան
անոր վրայ, սակայն պահանջեցին Պիղատոսէն որ
սպաննուի: Երբ անոր մասին բոլոր գրուածները
կատարած եղան, զայն խաչէն իջեցուցին եւ
գերեզման դրին: Բայց Աստուած զայն մեռեներէն
յարուցանեց, եւ Յիսուս բազմաթիւ օրեր երեւցաւ
անոնց՝ որոնք իրեն հետ Գալիլիայէն երուսաղէմ
եկած էին, եւ որոնք հիմա իր վկաներն են
ժողովուրդին առջեւ: Մենք ալ, ահա, ձեզի
կ'աւետենք, թէ Աստուած մեր հայրերուն տուած
իր խոստումը կատարեց մեր օրերուն, որ անոնց
որդիներն ենք: Այդ խոստումը կատարեց՝ Յիսուսը
յարուցանելով, ինչպէս երկրորդ Սաղմոսին մէջ ալ
գրուած է.

“Իմ որդիս ես դուն, այսօ՛ր քեզ ծնայ”:

Նոյն այն իրողութիւնը, որ Աստուած զայն
մեռեներէն յարուցանեց եւ անիկա այլեւս բնաւ
մահ պիտի չտեսնէ, խոստում մըն է՝ մեզի ուղղուած,
որովհետեւ Աստուած այսպէս կ'ըսէ.

“Զեզի պիտի տամ այն իսկական օրինութիւնը
որ Դաւիթի խոստացայ”, եւ ինչպէս ուրիշ Սաղմոսի
մը մէջ սաղմոսագիրը կ'ըսէ. “Պիտի չըողուս որ քու
ծառայիդ մարմինը փտութիւն տեսնէ”:

«Արդ, Դաւիթ իր սերունդին մէջ Աստուածոյ
ծառայելէ ետք մեռաւ եւ իր հայրերուն քով
թաղուեցաւ, եւ իր մարմինը փտեցաւ: Բայց
Աստուած յարուցանեց Յիսուսը, որուն մարմինը
փտութիւն չտեսաւ: Ուստի իմացէ՛ք, եղբայրներ,
Յիսուսի միջոցաւ մեղքերու թողութիւն կը
քարոզուի ձեզի: Ո՞վ որ անոր կը հաւատայ՝
կ'արդարանայ իր բոլոր մեղքերէն, որոնցմէ
չկրցաք արդարանալ Մովսէսի Օրէնքին միջոցաւ:
Զգո՛յշ եղէք ուրեմն որ ձեր վրայ չգայ այն ինչ
որ մարդարէները կ'ըսեն.

“Տեսէք, ո՞վ արհամարհոներ, զարմացէք եւ
կորսուեցէք. որովհետեւ ձեր օրերուն այնպիսի
գործ մը պիտի ընեմ, որուն պիտի չհաւատաք,
նոյնիսկ երբ մէկը պատմէ ձեզի”»:

Երբ Բառնաբաս ու Պօղոս ժողովարանէն դուրս ելան, մարդիկ կ'աղաչէին որ միւս Շաբաթ եւս նոյն նիւթին մասին խօսին: Ժողովուրդին ցրուելէն ետք, բազմաթիւ հրեաներ եւ հրէութեան դարձած բարեպաշտ օտարազգիներ հետեւեցան Պօղոսի եւ Բառնաբասի, որոնք անոնց հետ խօսեցան եւ համոզեցին զանոնք որ շարունակեն Աստուծոյ շնորհքին մէջ մնալ:

ԸՆԹԵՐՑՈՒՄ ՊԵՏՐՈՍ ԱՌԱ.ՔԵԱԼԻ ԸՆԴՀԱՆՐԱԿԱՆ ԱՌԱՋԻՆ ՆԱՄԱԿԻՆ (5.1-14)

Երէցներ, որպէս երիցակից մը որ ձեզի պէս վկայ եմ Քրիստոսի չարչարանքներուն եւ ձեզի հետ ալ մասնակից պիտի ըլլամ գալիք փառքին որ պիտի յայտնուի, կ'աղաչեմ ձեզի. ձեզի վստահուած Աստուծոյ հօտը արածեցէք ո'չ թէ իրբ պարտադրանք կատարելով վերակացութեան ձեր պաշտօնը, այլ կամաւորաբար, ինչպէս Աստուծ կ'ուզէ: Ո'չ թէ դրամի սիրոյն, այլ յօժարութեամբ: Ո'չ թէ ձեզի վստահուած մարդոց ձեր անձերը պարտադրելով, այլ օրինակ ըլլալով ձեր հօտին. որպէսզի երբ Հովուապետը յայտնուի՝ անթառամ փառքի պսակը ընդունիք:

Նոյնպէս ալ դուք, երիտասարդներ, հնագա'նդ եղէք ծերերուն: Բոլորդ ալ խոնարհաբար ծառայեցէք իրարու, որովհետեւ ինչպէս Առակաց Գիրքը կ'ըսէ.

“Աստուծ հակառակ է ամբարտաւաններուն, մինչ խոնարհներուն շնորհք կու տայ”:

Հետեւաբար Աստուծոյ հզօր ձեռքին տակ խոնարհեցէք, որպէսզի երբ յարմար ժամանակը գայ՝ ձեզ բարձրացնէ: Ձեր բոլոր հոգերը Աստուծոյ ձգեցէք, որովհետեւ ի՞նքը կը հոգայ ձեր մասին:

Արթուն եւ պատրաստ եղէք, որովհետեւ ձեր թշնամին՝ Սատանան առիւծի պէս մոնչելով կը շրջի եւ կլլելու համար մէկը կը փնտոէ: Հաստատուն հաւատքով դէմ դրէք անոր, դիտնալով որ աշխարհի մէջ բոլոր ձեր եղբայրներն ալ նոյն չարչարանքներէն կ'անցնին: Եւ բոլոր շնորհներու պարզեւիչը՝ Աստուծ, որ Քրիստոս Յիսուսի միջոցաւ իր յաւիտենական փառքին կանչեց ձեզ, նկատի ունենալով որ չափով մը մասնակից եղաք Յիսուսի չարչարանքներուն, պիտի ձեզ կազդուրէ, զօրացնէ եւ ամուր հիմերու վրայ հաստատէ ձեզ: Յաւիտեան ի՛րն են իշխանութիւնն ու փառքը: Ամէն:

Այս հակիրճ նամակը ձեզի գրեցի Սիրուանոսի ձեռքով - որ ըստ իս մեր հաւատարիմ եղբայրներէն

է - որպէսզի քաջալերեմ ձեզ եւ վստահեցնեմ թէ Քրիստոսի չարչարակից ըլլալը Աստուծմէ տրուած իսկական շնորհք մըն է, որ դուք կը վայելէք ապահովաբար: Այստեղ, Բաբելոնի մէջ գտնուող եկեղեցին, որ ձեր ընտրելակիցն է, կ'ողջունէ ձեզ: Նոյնպէս բարեւներ Մարկոսէն, իմ որդիէս: Սիրոյ համբոյրով ողջունեցէք զիրար: Խաղաղութիւն ձեր բոլորին որ Քրիստոս Յիսուսի միացած էք: Ամէն:

ՅԻՍՈՒՄ ՔՐԻՍՏՈՍԻ ԱԻԵՏԱՐԱՆԻՆ ԸՍ ՅՈՎՃԱՆՆԷՍԻ (5.19-30)

Յիսուս անոնց ըսաւ. «Հաստատ գիտցէք, թէ մարդու Որդին ինք իրմէ ոչինչ կը կատարէ, այլ կը կատարէ միայն այն՝ ինչ որ կը տեսնէ թէ Հայրը կը կատարէ: Որովհետեւ ինչ որ Հայրը կը գործէ, Որդին ալ նոյնը կը գործէ: Հայրը կը սիրէ Որդին եւ անոր ցոյց կու տայ ինչ որ ինք կը կատարէ: Տակաւին ձեր տեսածներէն աւելի սքանչելի գործեր ալ ցոյց պիտի տայ Որդիին, այնպէս որ դուք պիտի զարմանաք: Ինչպէս որ Հայրը մեռելները կը յարուցանէ եւ կեանք կու տայ անոնց, նոյնպէս ալ Որդին կեանք կու տայ անոնց՝ որոնց ինք կ'ուզէ: Եւ Հայրը ոեւէ մէկը չի դատեր, այլ դատելու իշխանութիւնը ամբողջութեամբ յանձնած է իր Որդիին, որպէսզի բոլորն ալ պատուեն Որդին, ինչպէս որ Հայրը կը պատուեն: Ան որ չի պատուեր Որդին, չի պատուեր Հայրը որ զայն դրկած է:

«Հաստատ գիտցէք, ան որ իմ խօսքերս կը լսէ եւ կը հաւատայ անոր որ զիս զրկեց, յաւիտենական կեանք ունի եւ պիտի չդատապարտուի, որովհետեւ արդէն իսկ մահէն կեանքի անցած է: Վստահ եղէք, ժամանակ կու գայ - եւ արդէն իսկ եկած է - երբ մեռելները Աստուծոյ Որդիին ձայնը պիտի լսեն եւ լսողները պիտի ապրին: Որովհետեւ, ինչպէս որ Հայրը կեանք պարգեւելու զօրութիւնը ունի իր մէջ, այդ զօրութիւնը տուած է նաեւ Որդիին: Նոյնպէս ալ դատելու իշխանութիւնը տուաւ Որդիին, որովհետեւ անիկա մարդու Որդին է: Ուրեմն մի՛ զարմանաք որ ըսի, թէ ահա կու գայ ժամանակը, երբ բոլոր անոնք որոնք գերեզմաններու մէջ են՝ պիտի լսեն անոր ձայնը եւ դուրս գան. անոնք որ բարիք գործած են՝ յարութիւն պիտի առնեն եւ ապրին, իսկ անոնք որ չարիք գործած են՝ յարութիւն պիտի առնեն եւ դատապարտուին: Ես ինձմէ չէ որ կը դատեմ, այլ կը դատեմ այնպէս ինչպէս Հօրմէս կը լսեմ. եւ ուրեմն իմ դատաստանս արդար է, որովհետեւ կը գործադրեմ ո'չ թէ իմ կամքս, այլ կամքը անոր՝ որ զիս զրկեց»: